

Encresciadum porta l ladin a "Suns"

L Festival de la ciantia tel lengaz de mendranza sarà a Udin ai 12 de setember

La desvalivanza linguistica raprejenta da semper una de la richèzes culturèles più beles de noscia region. Chesta ressorsa pel vegnir sfrelaussèda se la vegn palesèda demò trè l folclor ti singoi païjes, la pel enveze fiorir e perpeèr se la vegn durèda per creèr ponc con autra realtèdes culturèles autertant percacenses.

Te chest chèder i lengaz de noscia region sarà i protagonisè per "Suns", l festival de la ciantia tel lengaz de mendranza, endrezà da l'Arlef che se tegnarà al teater Palamostre de Udin ai 12 de setember che vegn.

L bando de concors de chesta manifestazion, out ai gropes de musega e ai artisè che raprejenta la mendranzes linguistiches te la Tèlia e te la Èlpes (Svizra, Austria e Slovenia) l'é stat slarià fora de mé e te pech più che doi meisc l'à permetù de regoer 23 cianties te 10 lengaz desferenc (ozitan, retoroman, ladin, arbëreshë, sard, catalan, sloven - carinzian e bencian - romani e furlan).

Apede a la desvalivanza di lengaz proponec dai gropes e artisè en concors l'é da uzèr fora ence la gran desferenza de sorts de musega portèdes

dant.

Anter chisc 23 partezipanc, olache l'era ite ence cater gropes che à prejentà na ciantia per ladin, na juria califichèda à selezionà la 8 cianties finalistes che vegnarà amò ejaminèdes endèna l'esibizion dal vif di 12 de setember che vegn.

Gran sodesfazion anter i artisè fascegn ajache una de la cianties selezionèdes per l festival l'é belapontin "Encresciadum", tutta fora dal nef Cd "Encresciadum - A Dream and a Tale" de musega jazz per ladin de la sociazion La Grenz de Moena.

I autres 7 gropes selezioné l'é: Dr deer & crc posse (Hip Hop sard), Harri Stoika (Gipsy Swing romani), Lou Seriol (Folk-Rock ozitan), Peppa Marriti Band (Rock arbëreshë),

R.Existence in Dub (Dub furlan/sard ensema al castigian dr Boost), Ursina Giger (ciantautora soul romantscha), Lino Straulino (ciantautor furlan).

L livel calitatif de chesta ot cianties l'é dalbon n muie aut e chest fèsc pissèr che sarà na bela endesfida anter i gropes per se vadagnèr i prumes doi posé che dèsc derit a la finalissima del LIET international che sarà a Ljouwert, capitala de la Frisia (Païjes Basc) de otober.

Suns l'é demò la ponta de l'iceberg de n lonch lurier che à portà a la candidatura de Udin per ge dèr alberch a la finèles del Liet del 2011. I é dò che i laora defat per chest event che é bon de binèr a una ogne an n numer dalbon aut de media e operadores culturèi (BBC e CNN l'é demò doi de la passa diesc televijions internazionèles che ogne an tol pèrt a chest festival).

No ge vel desmentier aboncont che la competizion l'é demò na vertola per creèr ponc anter n grum de cultures desferentes e te dut chest la musega raprejenta da semper un di terens più percacenc olà lurèr per la defendura del rich panoram di picoi gregn lengaz slarié fora te ogne cianton de l'Europa.



L grop "Encresciadum" al concert de prejentazion del CD al teater Cuminetti de Trent.